

Headline	Kuasa kawal selia mampu buka ruang tingkat penjanaan SESB		
MediaTitle	Harian Ekspres (KK)		
Date	21 Jan 2024	Language	Malay
Circulation	25,055	Readership	75,165
Section	Tempatan	Page No	2
ArticleSize	237 cm <sup>2</sup>	Journalist	N/A
PR Value	RM 3,777		



# Kuasa kawal selia mampu buka ruang tingkat penjanaan SESB

**KOTA KINABALU:** Penyerahan kuasa kawal selia bekalan elektrik Sabah dari-pada kerajaan Persekutuan kepada negeri dilihat mampu memberi ruang untuk meningkatkan bahagian pasaran penjanaan Sabah Electricity Sdn Bhd (SESB).



Pengerusi SESB Datuk Seri Wilfred Madius Tangau berkata bahagian pasaran penjanaan syarikat itu adalah pada tahap 20 peratus, berbanding 80 peratus yang dijana oleh penjana tenaga bebas (IPP) di negeri ini menyebabkan kebergantungan tinggi bekalan tenaga elektrik Sabah kepada IPP tersebut.

Beliau berkata kuasa kawal selia itu mampu membuka ruang bagi membolehkan gas asli secara utamanya digunakan bagi menjana tenaga elektrik di negeri itu, berbanding keutamaan lain sebelum ini.

“Kita mahu tingkatkan bahagian pasaran penjanaan supaya SESB lebih sihat sebagai syarikat pembekal utiliti elektrik dan kita harap dengan kawal selia ini proses ke arah itu (utamakan gas asli untuk jana elektrik) lebih mudah kerana kita amat memerlukan bahan api untuk menjana elektrik.

“Jadi, kita mahukan supaya penjanaan elektrik diberikan keutamaan dalam penggunaan gas asli ini kerana sebelum ini keutamaan diberikan kepada hasilkan LNG (gas asli cecair) kemudian pihak industri barulah untuk jana elektrik. Selepas ini kita mahu jana elektrik diutamakan dahulu,” katanya kepada Bernama.

Beliau ditemui selepas majlis simbo-

lik penyerahan kuasa kawal selia bekalan elektrik Sabah daripada Timbalan Perdana Menteri Datuk Seri Fadillah Yusof yang mewakili kerajaan Persekutuan kepada Ketua Menteri Datuk Seri Hajiji Noor mewakili kerajaan negeri di sini, Jumaat.

Madius berkata gas asli yang digunakan untuk penjanaan elektrik itu pula dibeli pada harga yang mahal di pasaran, dan sekiranya kos pembelian itu dialihkan kepada pengguna akan menyebabkan kenaikan tarif elektrik yang membebangkan mereka.

“Kita harap harga itu dikawal kerajaan negeri dan Petronas supaya semua pihak antaranya SESB mampu jana tenaga elektrik, manakala pengguna mampu bayar tarif elektrik yang tidak membebangkan mereka. Jadi, dengan adanya kuasa kawal selia ini kita boleh bincang semuanya bersama di Sabah ini,” katanya.

Pada 3 Jan lepas, Persidangan Khas Dewan Undangan Negeri (DUN) Sabah meluluskan tiga rang undang-undang (RUU) berkaitan pengambilalihan kuasa kawal selia tenaga dan bekalan elektrik oleh kerajaan negeri daripada kerajaan Persekutuan.

RUU Suruhanjaya Tenaga Sabah (Pinidaan) 2024, RUU Tenaga Boleh Baharu Sabah 2024 dan RUU Bekalan Elektrik 2024 itu diluluskan dengan suara terbanyak.

Pada 10 Jan tahun lepas, persidangan DUN Sabah meluluskan tiga RUU dengan suara majoriti berkaitan ambil alih kuasa kawal selia bekalan gas oleh kerajaan Sabah daripada kerajaan Persekutuan iaitu RUU Suruhanjaya Tenaga Sabah 2023 dan RUU Bekalan Gas 2023. – Bernama